

Inuit innarluutillit tapersorsorneqarnissaannut Namminersorlutik Oqartussat nalunaarutaat

Inuit innarluutillit tapersorsorneqarnissaannut Inatsisartut inatsisaat nr. 13, 12. juni 2019-imeersumi § 9, imm. 3, § 24, imm. 2, § 25, imm. 9, § 26, imm. 7, § 27, imm. 2, § 28, imm. 4, § 30, imm. 3, § 37, imm. 3, § 40, imm. 5, § 41, imm. 4, § 45 aamma § 76, imm. 2 malillugit aalajangersarneqarput:

Kapitali 1

Suliamik suliarinninneq

Qulaajaaneq aamma iliuusissanut pilersaarutit

§ 1. Inuk innarluutilik tapersorsorneqarnissamik pisariaqartitsisoq kommunalbestyrelsip paasiguniuk, inuup piariaqartitaanik kommunalbestyrelse qulaajaassaaq.

Imm. 2. Qulaajaaneq sapinngisamik toqqammaveqarluartumik piviusunngortinneqassaaq, matumani ilaqqat, peqqinnissaqarfik kiisalu oqartussaasut allat attuumassuteqartut suliffeqarfiillu inummut innarluutilimmut ilisimannittut ilanngutitinneqarneri ilanngullugit.

Imm. 3. Inummut innarluutilimmut kiisalu taassuma ilaqutaanut qanigisaanullu, tapersiissutit suut naleqquttuunersut qulaajaanermi qulaajarneqassapput nassuiarneqarlutillu.

Imm. 4. Inuk innarluutilik tapersorsorneqarnissamik pisariaqartitsisoq kommunalbestyrelsimit paasineqarneraniit, qulaajaaneq kingusinnerpaamik qaammatit marluk qaangiunnerini naammassineqarsimassaaq. Qulaajaanerup naammassineqarneranut atatillugu tapersersuinerup imaluunniit ikiutitut atortut qanoq ittut akuersissutigineqarnerat pillugu allakkatigut aalajangiisoqarsimassaaq, kiisalu iliuusissanut pilersaarut allaganngorlugu suliarineqassalluni.

Imm. 5. Qulaajaanerup naammassineqarneraniit qaammatip ataatsip iluani iliuusissanut pilersaarut suliarereersimassaaq.

Imm. 6. Qulaajaaneq naammassineqarsinnaanngippat, imaluunniit imm. 4 aamma 5-imi piffissaliussaasut iluanni iliuusissanut pilersaarut suliarineqarsimanngippat, kommunalbestyrelse naliliinerugallartumik suliarinnissaaq, inullu innarluutilik tamanna pillugu allakkatigut, qulaajaanerup qaqugukkut naammassineqarsinnaanerata imaluunniit iliuusissanut pilersaarutip suliarineqarsinnaanerata ullulernera ilanngullugu taallugu ilisimatissallugu.

Imm. 7. Qulaajaanerup isumaginerani iliuusissanullu pilersaarusiornermi isumaginninnermut Aqutsisoqarfimmit pitsaassutsit innersuussutigineqartut kommunalbestyrelsip atussavai.

Ineriartornermut pilersaarutit aamma killiffik pillugu nalunaarusiat

§ 2. Iliuusissanut pilersaarutit aallaavigalugit ineriartornissamut pilersaarutit allaganngorlugit ulloq unnuarlu neqeroorutip suliarissavai, taakkulu tulluuttunik imaqassapput:

- 1) Tapersersuineramik suliniutit aallartinneqartut taaneqarnerat, matumani makku ilanngullugit:
 - a) ilinniartinneqarnissamik neqeroorutit,
 - b) ilinniagaqarnissamik neqeroorutit,
 - c) suliffeqartinneqarnissamut neqeroorutit, matumani suliffiit illersugaasut ilanngullugit, aamma
 - d) sammisaqartitsinneqarnissanut aamma katerisimaaqateqartinneqarnissanut neqeroorutit ilanngullugit.
- 2) nr. 1 malillugu tapersersuineramik suliniutinut aallartinneqartunut atatillugu perorsaaneramik periaatsit paaqqinninnermilu atorineqartut taaneqarnerat,
- 3) Tapersersuineramik suliniutissat toqqarneqarneranni inuup innarluutillip qanoq akuutinneqarnerata allaaserineqarnera, aamma
- 4) Tapersersuineramik suliniutini aallartinneqartuni anguniakkat, matumani suliap ingerlaneranut piffissaliussamullu sinaakkusiussat ilanngullugit.

Imm. 2. Ulloq unnuarlu neqeroorutip killiffimmik nalunaarusiat ataavartumik suliarisassavai, taakkualu tapersersuineramik suliniutit aallartinneqarsimasunut, allaganngorlugu ineriartornissamik pilersaarummi allassimasunut naleqqiullugit, inuup innarluutillip ineriartorneranik allaaserinninnermik imaqassapput.

Illersuisoqarnermik aaqqissuussineq

§ 3. Illoqarfinni tamani kommunimi illersuisut ikinnerpaamik marluk inunnik innarluutilinnik illersuisuusussat kommunalbestyrelsip toqqassavai.

Imm. 2. Illersuisut kommuninut qinigaaffiit malillugit toqqarneqartassapput toqqagaaqqinneqarnissamut periarfissaligaallutik. Piffissap qinigaaffiusup nalaani illersuisoq tunuarpat, piffissap qinigaaffiusup sinneranut kommunalbestyrelse illersuisumik nutaamik toqqaassaaq.

Imm. 3. Illersuisumik toqqaanermut atatillugu, pineqaatissinneqarsimannginnermik uppernarsaat piniarneqassaaq. Attuumassuteqassappallu meeqqanik pinerliisimannginnermik uppernarsaat aamma piniarneqassaaq.

§ 4. Illersuisoq inunnik innarluutilinnik illersuisuusussaq, tassaassaaq inuk isumaginninnermik inunnillu innarluutilinnik suliaasaqarfinni sukumiisumik ilisimasalik misilittagaqartorlu, kiisalu isumaginninnermik aqutsisoqarfiup illersuisunut pikkorissarnissamik neqeroorutaanik naammassinnissimasoq.

Imm. 2. Inuk inatsisilerituutut, inunnik siunnersortitut, immikkut ittumik perorsaasutut ilinniarsimasuuppat, kiisalu inunnut innarluutilinnut suliaasaqarfimmit misilittagaqarpat, illersuisutut pikkorissarnissamik piumasaqaat avaqqunneqarsinnaavoq.

Kapitali 2

Inuttut ikiorteqarnek isumassorneqarnerlu

§ 5. Pissutsit tamanna ajornartinnigippassuk, kommunalbestyrelsip inuk innarluutilik tulluuttunik neqeroorfigissavaa:

- 1) inuttut ikiorteqarnek,

2) angerlarsimaffimmi suliassanut pisariaqartinneqartunut tapersersuineq, aamma

3) nerisassanik sullinneqarneq.

Imm. 2. Imm. 1 malillugu tapersersuineq inunnut innarluuteqarnertik pissutigalugu suliassanik taakkuninnga namminneq suliarinnissinnaangitsunut neqeroorutigineqartassaaq.

§ 6. Inuit innarluutillit tapersersorneqarnissaannut inatsimmi § 40, imm. 1 amma 2 malillugit inuup innarluutillip ulluinnarni isumassuineramik suliaqartussaq atorfinitsinneqarpat, pineqartup ulluinnarni isumassuineramik suliaqarnini pissutigalugu allatut iliorluni tamakkiisumik ilaannakortumilluunniit akissarsianik nalinginnaasunik akissarsiaqarsinnaanginnera atorfinitsinermut piumasaqaataavoq.

Imm. 2. Aningaasarsiat minnerpaaffissaattut annerpaaffissaattullu killerisitat Naalakkersuisut aalajangigaasa iluiniissapput. Isumaginninnikkut aningaasat tunniunneqartartut atuuttut pillugit kaajallaasitaq malillugu ukiumoortumik 1. januar minnerpaaffissatut annerpaaffissatullu killerisitat Naalakkersuisut tamanut saqqummiuttarpaat.

Imm. 3. Annerpaamik sapaatip akunneranut nalunaaquttap akunneri 40-it akissarsissutaasinnaapput.

Kapitali 3

Oqilisaassisarneq

§ 7. Inuk innarluutilik oqilisaanneqarnissamik najugaqartinneqarnissaminik neqeroorfigineqarpat, tak. Inuit innarluutillit tapersersorneqarnissaat pillugu Inatsisartut inatsisaani § 41, imm. 1-3, najugaqarnermi atugassarititaasut pillugit kommunalbestyrelse oqilisaassivisorlu allaganngorlugu isumaqatigiissuteqassapput.

Imm. 2. Ilaqutariinnut paarsisartunut imaluunniit ulloq ulluarlu neqeroorummot Kommunalbestyrelse akissarsiaqartitsinissaminut tapiissuteqassaaq. Oqilisaassinerup nalaani aningaasarsiat inuup pilersorneqarneranut aningaasartuutinut ilaanggillat.

Imm. 3. Pilersuineranut akiligassat pilersuisussaataitaasumit imaluunniit pilersuisussaataitaasunit akiligassarineqassapput.

Imm. 4. Inuk innarluutilik 18-it ataallugit ukioqarsimappat imaluunniit nammineersinnaassuseqanngippat, inuk innarluutilik aamma/imaluunniit angajoqqaatut oqartussaasoq imaluunniit angajoqqaatut oqartussaagallartoq, aamma/imaluunniit ulloq unnuarlu paaqqinnittarfik, pineqartup kommunimi najugaqarfiani kommunalbestyrelse suleqatigalugu, akunnerminni isumaqatigiissutigissavaat pilersorneqarneranut qanoq iliornikkut akiliisoqartassanersoq.

§ 8. Pilersuineranut aammalu ilaqutariinnut paarsisartunut akissarsiaqartitsisarnissamut akigititat ukiut tamaasa procentimut aaqqiissutissamut nalimassarneqartassapput. Inunnut innarluutilinnut ulloq unnuarlu neqeroorumiitsitsineri akigititat Naalakkersuisut aammalu kommunit akornanni isumaqatigiissutiginiarneqartassapput.

Imm. 2. Ukiut tamaasa 1. januaarimiit annertussusiliussat tamanut Naalakkersuisunit nalunaarutigineqartassapput, tak. Isumaginninnikkut aningaasat tunniunneqartartut atuuttut pillugit kaajallaasitaq.

Kapitali 4

Atortorissaarutit

§ 9. Inummut innarluutilimmut atortorissaarutit pissarsiariniarnerannut kommunalbestyrelse tapersiissaaq, atortutorissaarutit imaappata:

- 1) inuup innarluutillip innarluutaata malitsigisaanut annertuumik iluaqutaasinnaappata,
- 2) inuup ulluinnarni inuuneranut pingaaruteqartumik oqilisaataasinnaappata, imaluunniit
- 3) inuup inuussutissarsiumminik ingerlatsisinnaaneranut pisariaqartinneqarpata.

Imm. 2. Inuit innarluuteqanngitsut namminnek inuttut atugassaminnik pissarsiniarnermi ulluinnarnilu inuuniarnermut nalinginnaasumik aningaasartuutaannut annertuumik qaangiisoqassatillugu, atortorissaarutit pissarsinissamut taamaallaat tapersiisoqarsinnaavoq.

Imm. 3. Atortorissaarutit attartugassanngorlugit tunniunneqarsinnaapput.

§ 10. Inuit innarluutillit atortorissaarutit toqqaaneranni kiisalu taakku atorneqarnissaannik kommunalbestyrelsip siunnersortassavai.

Imm. 2. Imm. 1 malillugu siunnersuinermit suliaqarnerminni kommunalbestyrelse Pissassarfimmit - Inunnut Innarluutilinnut Sullissivimmit Nunamut Tamarmut Atuuttumit ilitersoqqusinnaavoq.

§ 11. § 9 malillugu atortorissaarutit tapiissuteqarfigineqartut, atortorissaarutit atorsinnaanerannut iluarsaassineq allanngutsaaliunerlu pisariaqartinneqarpata, iluarsaannerannut allanngutsaaliornerrannullu aningaasartuutit kommunalbestyrelsip akilertassavai.

Imm. 2. Suliat imm. 1-imi pineqartut suliarineqartillugit, atortorissaarutit taarserneqarnissaat aningaasaqarnikkut naleqqunnerunnginnersoq kommunalbestyrelsip nalilersussavaa.

Kapitali 5

Angerlarsimaffiup aaqqissugaanera

§ 12. Inuup innarluutillip angerlarsimaffiata immikkut ittumik aaqqissuunneranut kommunalbestyrelse pineqartumut tapersiissaaq ima pisoqartillugu:

- 1) angerlarsimaffik pineqartumut angerlarsimaffittut tulluarnernulernissaanut tamanna pisariaqartinneqarpata,
- 2) aaqqissuunneratigut inuk pineqartoq angerlarsimaffimmini nammineersinnaassuseqalersinnaappat, aamma
- 3) inuk pineqartoq nammineq angerlarsimaffimminiippat, matumani najugaqaqatigiiffinni imaluunniit najugaqarfimmi illersugaasumi najugaqarnera ilanngullugu.

Imm. 2. Taamaallaat aningaasartuutit inuup innarluuteqanngitsup nalinginnaasumik angerlarsimaffimminik aaqqissuussinermit atortagaanit aningaasartuutit annertuumik amerlaneruppata imm. 1 malillugu tapiissuteqartoqarsinnaavoq.

Imm. 3. Angerlarsimaffimmi aaqqissuussinermit atatillugu kommunalbestyrelsip inuk innarluutilik ajornanngippat sapinngisamik piaarnerpaamik akuutissavaa.

Kapitali 6

Qamutit motoorillit

§ 13. Inuk innarluutilik ulluinnarni piffinni ataatsimoorussamik angallassiffiusinnaanngitsuni taxarfiusinnaanngitsuniluunniit najugaqarpat aneertarpalluunniit, qamutit motorillit pisiarinerinut kommunalbestyrelse tapersiissaaq, taamaattoq biilit pinnagit.

Imm. 2. Imm. 1 malillugu angallassissutip pisiarineranut tapiissuteqarfigineqartup ingerlanneranut aningaasartuutit matussusernerannut kommunalbestyrelse tapiissuteqartassaaq, matumani tulluuttut matussusernerat ilanngullugit:

- 1) nalinginnaasumik aserfallatsaaliorneqarnerannut, matumani suliarinerannut,
- 2) iluarsaanneqarneranut, aamma
- 3) qularnaveeqquserneranut.

Imm. 3. Taamaallaat imm. 2, nr. 1 aamma 2 malillugit qamutimik motorilimmik assigisaanik nutaamik pisinissamut akigititat annertunerunngippata tapiissuteqartoqartassaaq. Imm. 2, nr. 1 aamma 2 malillugit aserfallatsaaliuinnermut iluarsaanneqarneranulluunniit tapiissuteqartoqassanersoq, imaluunniit angallassissummik motorilimmik assigisaanik nutaamik pisisoqassanersoq kommunalbestyrelsip toqqarsinnaavaa.

§ 14. Inuk innarluutilik angallassissummik allanngortinneqanngitsumik atuisinnaanngippat qamutip motorillip, matumani biilip immikkut ittumik aaqqissuunneranut, kommunalbestyrelse tapiissuteqassaaq.

Imm. 2. Qamutip motorillip, matumani biili ilanngullugu, pisariaqartitamik aaqqissuunneranut tapiissuteqartoqassaaq, imaappat:

- 1) qinnuteqartup peqqissutsikkut atugaata taamaattariaqartippagu, imaluunniit
- 2) qinnuteqartup biilimi inissisimanera oqinnerulersippagu.

Imm. 3. Biilimut automatgearinik ikkussinermut tapiissutit automatgearimut aningaasartuutit annertoqatigissavaat, taamaattoq annertunerpaamik 25.905 kr.-ussallutik. Biilip ukioq ataaseq inorlugu pisoqaassuseqarnissaa, fabrikkimiillu automatgearimik pilerneqarsinnaanera tapiissuteqarnissamut piumasagaataavoq.

Imm. 4. Imm. 3 malillugu biilip automatgeariisa taarserneqarsinnaanissaannut tapiissuteqaqqinnissaaq, siusinnerpaamik tapiissutit kingulliit tunniunneqarneraniit, ukiut 8-t qaangiutereerneranni tunniunneqarsinnaapput, taamaattoq tak. imm. 5. Qinnuteqartoq ukiut 7-t qaangiunneranni tapiissuteqarfigineqaqqinnissamut qinnuteqarsinnaavoq, taamaasilluni kommunalbestyrelsip piffissamit tassanngaanniit suliaq suliaralugu aallartissinnaassammagu.

Imm. 5. Imm. 3 malillugu biilip automatgeariinik taarsiinissamut kingullermik tapiiffigineqarnermiit ukiut 8-t qaangiutsinnagit tapiisoqarsinnaavoq ima pisoqartillugu:

- 1) qinnuteqartup timiminik atuisinnaanerata allanngornera pissutigalugu biili naleqqukkunnaarsimappat,
- 2) qinnuteqartup peqqissutsini pissutigalugu biilini allamik taarsertariaqalersimappagu,
- 3) qinnuteqartup ilaquttamini pissutsit pissutigalugit biilini allamik taarsertariaqalersimappagu,
- 4) sullivinnit akuerisanit nalunaaruteqartoqarnerisigut uppernarsarneqarpat, biilip taarserneqarnissaa pisariaqartinneqartoq,
- 5) biili aserorluinnarneqarsimappat,
- 6) biili iluarsaanneqarsinnaanngippat, imaluunniit
- 7) sullivinnit akuerisanit nalunaaruteqartoqarnerisigut uppernarsarneqarpat biilip iluarsaanneranut aningaasartuutit naapertuutinnngitsumik annertussuseqassasut.

Imm. 6. Biilip qinnuteqartumit imaluunniit inoqutigiinni inummit allamit pigineqarnissaa tapiissuteqarnissamut piumasaqaataavoq.

Imm. 7. Imm. 2 aamma 3 malillugit iluarsaassinnermut, taarsiinnermut aamma ingutserinnermut pisariaqartitamillu aaqqissuussinnermut pisariaqartitat malillugit tapersiisoqassaaq.

Kapitali 7

Pikkorissanerit siunnersuinerillu

§ 15. Ataasiakkaat ulluinnarisaminnik aqutsinissamut pikkorinnerulernissat siunertaralugu, inuit innarluutillit pikkorissarnernut ilinniartitaanernullu il.il. peqataanissaannut kommunalbestyrelsip neqeroorfigisassavai.

Imm. 2. Imm. 1 malillugu pikkorissarnernut ilinniartitaanermulluunniit peqataanermut kommunalbestyrelse aningaasatigut tapiissuteqarsinnaavoq.

Imm. 3. Pikkorissarnerit ilinniartitaanerillu pillugit kommunalbestyrelse Pissassarfimmut - Inunnut Innarluutilinnut Sullissivimmut Nunamut Tamarmut Atuuttumut ilitserorneqarnissamik noqqaassuteqarsinnaavoq.

§ 16. Inuit innarluutillit ilaqutaannut kommunalbestyrelse siunnersuisassaaq.

Imm. 2. Inuup innarluutillip ulluinnarisaasa oqinnerulernissaanut pitsaanerulernissaanullu atatillugu, ilaqutaasup ikorfartorneqarnissaa aamma ilaqutaasup piginnaasaasa patajaallisaavigineqarnissaat siunertaralugit inuit innarluutillit ilaqutaannut pikkorissarnernut ilinniartitsinernullu peqataatitsinissamik kommunalbestyrelse neqerooruteqartassaaq.

Imm. 3. Imm. 1 malillugu siunnersuinnermut kiisalu imm. 2 malillugu pikkorissarnernut ilinniartitaanernullu atatillugu, Inuit innarluutillit tapersersorneqarnissaannut Inatsisartut inatsisaat malillugu imaluunniit inatsisit allat malillugit, ilaqutaasup ikiorneqarnissaa pisariaqartoq kommunalbestyrelsip maluginiassavaa.

Kapitali 8

Suliffeqartitsinissanut, sammisassaqartitsinissanut katerisimaaqateqartitsisarnissanillu neqeroorutit

§ 17. Inummut innarluutilimmut 18-it sinnerlugit ukiulimmut, innarluuteqarnini pissutigalugu suliffeqarfeqarfimmi nalinginnaasunik atugassaqartitaalluni suliffeqalersinnaanngitsumut imaluunniit suliffimminik attassiinnarsinnaanngitsumut, inatsisillu allat malillugit neqeroorutinik atuisinnaanngitsumut kommunalbestyrelse suliffimmik neqerooruteqartassaaq, taamaattoq tak. § 20.

Imm. 2. Sullivinnik illersugaasunik aamma suliffinnik illersugaasunik kommunalbestyrelse pilersitsinnaavoq ingerlatsisinnaallunilu, taakkunani sulineq ingerlanneqarsinnaalluni.

Imm. 3. Imm. 1 malillugu ulloq unnuarlu neqeroorummut atasumi sannavimmi illersugaasumi imaluunniit suliffimmi illersugaasumi sulinerup pisinnaanera pillugu kommunalbestyrelse Naalakkersuisunit imaluunnit ulloq unnuarlu neqeroorummut isumaqatigiissuteqarsinnaavoq. Tassunga ingerlatsisumut kommunalbestyrelse akigititamik Naalakkersuisunit aalajangersagaasumik akiliuteqartassaaq.

Imm. 4. Imm. 1 malillugu inuit innarluutillit sulisinnerqartut sammisaqartitsinnermut aningaasarsianik Naalakkersuisunit aalajangerneqartunit kommunalbestyrelsimit akissarsitinnerqartassapput.

Imm. 5. Inuit innarluutillit sannavimmi suliffimmiluunniit illersugaasumi niuernerpalaartumik

sulisinneqartut, sammisaqartitsinermut aningaasarsianik akissarsiaqartinneqassapput.

Imm. 6. Imm. 5 malillugu sammisaqartitsinermut aningaasarsiat iluseq tulluuttooq malillugu aalajangersarneqassapput:

- 1) Inuit sulisinneqartut sapinngisamik suliaqarnertik malillugu akissarsiaqartinneqassapput.
- 2) Sulineq malillugu akissarsitinneqartarnermi akissarsiaritinneqartut tunngavissatut naleqqutinngippata, pisuni ataasiakkaani sulinerup nalilersoreerneratigut nalunaaquttap akunneranut akissarsiat atorneqassapput.
- 3) Inuk annikitsuaraannarmik suliaqarsinnaappat, sulinerlu annikitsuinnarmik akissarsiaqartitaasinnaappat, taava suliassaqarfimmi pineqartumi isumaqatigiissutit malillugit aningaasarsiat minnerpaat minnerpaamik 15%-isut suliamut akissarsiaq aalajangersarneqassaaq.

§ 18. Inummut innarluutilimmut, inuup inuttut piginnaasaasa, inuunermi atugarisaasa kiisalu inuunerup pitsaassusaata attatiinnarnissaannut imaluunniit pitsanngorsarnissaannut kommunalbestyrelse sammisaqartitsinissanik katerisimaaqateqartitsinissanullu neqerooruteqassaaq, taamaattoq tak. § 20, imm. 1.

Imm. 2. Kommunalbestyrelse ulluunerani ornittakkanik aamma sannavinnik illersugaasunik pilersitsisinnaavoq ingerlatsisinnaallunilu, taakkunani sammisaqartitsinernut katerisimaaqateqartitsinernullu neqeroorutit ingerlanneqarsinnaallutik.

Imm. 3. Sammisaqartitsinernut katerisimaaqateqartitsinernullu neqeroorutit ulloq unnuarlu neqeroorummot atatillugu ulluunerani ornittakkami imaluunniit sannavimmi illersugaasumi ingerlassinnaanerit pillugu kommunalbestyrelse Naalakkersuisunut imaluunniit ulloq unnuarlu neqeroorummot isumaqatigiissuteqarsinnaavoq. Tamatumunnga akigititamik Naalakkersuisunit aalajangersagaasunik kommunalbestyrelse akiliuteqartassaaq.

Imm. 4. Inunnut sammisaqartitsinermut katerisimaaqateqartitsinernullu neqeroorutit innersuunneqartunut kommunalbestyrelse akissarsiaqartitsissanngilaq allatigulluunniit akissarsiaqartitsinani.

§ 19. § 17 malillugu inunnut innarluutilinnut suliffinnut innersuunneqartunut, imaluunniit § 18 malillugu sammisaqartitsinermut katerisimaaqateqartitsinernulluunniit innersuunneqartunut angallassinernut aningaasartuutit naleqquttut kommunalbestyrelsip akilertassavai.

§ 20. Inuit innarluutillit tapersorsorneqarnissaannut Inatsisartut inatsisaanni § 48 malillugu inunnut innarluutilinnut ulloq unnuarlu neqeroorutit najugaqartunut, suliffeqartitsinissamik, sammisaqartitsinissamik katerisimaaqateqartitsisarnissanillu Naalakkersuisut neqerooruteqartassapput.

Imm. 2. Sannavinnik illersugaasunik, suliffinnik illersugaasunik kiisalu ulluunerani ornittakkanik Naalakkersuisut pilersitsisinnaapput ingerlatsisinnaallutillu, taakkunani suliffeqartitsinissamik, sammisaqartitsinissamik katerisimaaqateqartitsisarnissanillu neqeroorutit ingerlanneqarsinnaallutik.

Imm. 3. §§ 17 aamma 18 malillugit sulinermut aamma sammisaqartitsinermut katerisimaaqateqartitsisarnernullu neqeroorutit, sannavimmi illersugaasumi, suliffimmi illersugaasumi imaluunniit ulluunerani ornittakkami kommunalbestyrelsimit ingerlanneqartumi, ingerlanneqarsinnaaneri pillugit Naalakkersuisut kommunalbestyrelsimut isumaqatigiissuteqarsinnaapput.

Imm. 4. Imm. 1 malillugu inuit innarluutillit sulisinneqartut sammisaqartitsinermut aningaasarsianik Naalakkersuisunit aalajangerneqartunit Naalakkersuisunit akissarsitinneqartassapput.

Kapitali 9

Ataatsimoortumik angallassinermik aaqqissuussineq

§ 21. Ataatsimoortumik angallassinermik aaqqissuussinertut ittumik, inuk innarluutilik kommunalbestyrelsip neqeroorfigisinnaavaa.

Imm. 2. Ataatsimoortumik angallassinermut aaqqissuussinermut qamutit motorillit kommunalbestyrelsip atugassiissutigisinnaavai. Aaqqissuussineq peqqinnissaqarfik imaluunniit suleqatigiiffik namminersortoq suleqatigalugu pilersinneqarsinnaavoq.

Kapitali 10

Ingiaqateqartitsineq

§ 22. Inummut innarluutilimmut innarluuteqarnini pissutigalugu kisimiilluni angalaarsinnaanngitsumut kommunalbestyrelsip qaammammut nalunaquttap akunneri 15-it tikillugit ingiaqateqartitsisarnissaq neqeroorutigisassavaa.

Imm. 2. Ingiaqataasoq kommunalbestyrelsip akuersissutigisavaa atorfinitsillugulu.

Imm. 3. Inuup ingiaqateqarnissamut pisinnaatitaaffeqartup, inuk ingiaqatissani nammineq siunnersuutigisinnaavaa.

Imm. 4. Imm. 1-ip malitsigisaata qaavatigut pineqartup sulinngiffeqarluni angalanissaa siunertaralugu, sulinngiffeqarluni angalanissaq ingiaqateqarnani piviusunngortinneqarsinnaanngippat, inummut innarluutilimmut kommunalbestyrelsip ingiaqateqarnissaq neqeroorutigisinnaavaa.

Imm. 5. Sammisanut sunut ingiaqateqarusunnerluni inuup innarluutillip nammineq aalajangissavaa. Taamaattoq taamaallaat sammisanut isumaginninnermi perorsaasunit tapersersorneqarnissamik pisariaqartitsiviunngitsunut ingiaqateqartoqarsinnaavoq.

Imm. 6. Najukkami piffiit assigiinngitsut ataasiakkaat akornanni ingiaqataasup angallanneqarnermut aningaasartuutai kommunalbestyrelsip akilissavai.

Imm. 7. Ingiaqataasumik atorfinitsitsinermut atatillugu kommunalbestyrelsip pineqaatissinneqarsimannginnermik uppernarsaat piniassavaa. Attuumassuteqassappallu meeqqanik pinerliisimannginnermik uppernarsaat aamma piniarneqassaaq.

Kapitali 11

Aningaasartuutaanerusut

Kommunalbestyrelsip pisussaaffii piginnaatitaaffilu

§ 23. Aningaasartuutaanerusut pingaaruteqartut pillugit kommunalbestyrelse inummut innarluutilimmut aningaasatigut ikiorsiissuteqassaaq.

Imm. 2. Inuup innarluutillip angerlarsimaffimmi pilersorneranut aningaasartuutaanerusut pingaaruteqartut matussuserniarlugit kommunalbestyrelse aningaasanik tapiissuteqassaaq.

§ 24. § 23 malillugu inuup pineqartup innarluuteqarnerata malitsigisaanik aningaasartuutaanerusut pingaaruteqartut matussusernerannut taamaallaat tapiissuteqartoqarsinnaavoq, taakku inatsisit allat imaluunniit Inuit innarluutillit tapersorneqarnissaannut Inatsisartut inatsisaanni aalajangersakkat allat malillugit matussuserneqarsinnaanngippata.

Imm. 2. Aningaasartuutaanerusut matussuserneqarnissaannut tapiissutit aningaasatigut isertitat apeqqutaanngillat akileraarusigassaanatillu.

Naatsorsuineq

§ 25. Inunnut ataasiakkaanut aningaasartuutaanerusut ilimanarnerulersitat uppersarsaasigaasulluunniit tunngavigalugit tapiissutip annertussusissaata naatsorsornera pisassaaq.

Imm. 2. Aningaasartuutaanerusut ilimanarnerulersitat naapertorlugit naatsorsuineq pippat, aningaasartuutaanerusussanut ilimanarnerulersitanut missingersuummik kommunalbestyrelse aalajangiissaaq. Aningaasartuutaanerusussanut missingersuutit aningaasartuutit pineqartut agguaqatigiissillugu qaffasissusaannut aalajangerneqassapput.

Imm. 3. Ataavartumik aningaasartuutit aamma aningaasartuutit ataasiakkaat aningaasartuutaanerusunut ilaapput.

§ 26. Aningaasartuutaanerusussat ukiumut minnerpaamik kr. 6.000-inik, qaammammut 500 kr.-t nalinginik annertussuseqarpata, aningaasartuutaanerusunut pingaaruteqartunut tapiissutit taamaallaat tunniunneqarsinnaapput. Qaammammut aningaasartuutaanerusussatut missiliunneqartunut tapiissutit aalajangerneqassapput aamma aningaasartanut 100-imik agguarneqarsinnaasunut qaninnerpaanut akunnaallillugit tunniunneqassallutik.

Imm. 2. Tapiissutit aallaavittut aningaasanngorlugit tunniunneqassapput. Tapiissutilli ilai nioqqutissanut tapiissutit tunniunneqarnissaat isumaqatigiissutigineqarsinnaavoq, taakku kommunimit toqqaannartumik akilernerneqassapput.

Imm. 3. Tapiissutit ilaat aningaasanngorlugit tunniunneqartartut qaammatikkuutaartumik tunniunneqartassapput. Aningaasat kommunimit toqqaannartumik akilernerneqartut qaammatikkuutaartumik tapiissutinit ilanngaaticineqartassapput.

Naatsorsueqqinneq

§ 27. Aningaasartuutaanerusut ilimanarnerulersitat uppersarsarneqartulluunniit, kommunalbestyrelsip tapiissutininik akilernerneqartunik tunngavigisai, allannguuteqarpata, tapiissutit taakku naapertorlugit allanngortinneqassapput.

Imm. 2. Aningaasartuutaanerusut ilimanarnerulersitat uppersarsarneqartulluunniit annertunerulersimappata, taamaakkaluartoq kingullermik aalajangersaasoqarneranit ukioq ataaseq qaangiutsinnagu inuup aningaasartuutaanerusunut tapiissutisartup tapiissutit aalajangersaavigineqaaqqinnissaat piumasaqaatigisinnaanngilaa.

Imm. 3. Taamatut qaffariartoqarsimatillugu tapiissutip tunniunneqartartup allanngortinneqarneranik

aalajangersaaneq aningaasartuutaanerusut ilimanarnerulersitat uppersarsarneqartulluunniit qaffaffianniit kingumut atuutsitsillugu qaffaaneq pissaaq.

Aningaasartuutaanerusut ataasiaannarlutik pisut

§ 28. Aningaasartuutaanerusunut ataasiaannartumik pisunut tapersiinissaq pisariaqartinneqalerpat, qaammammut pisartakkanut aaqqiissutigineqanngitsumik tamanna ataasiaannarluni tunisinikkut pisinnaavoq. Inuup pineqartup § 23 malillugu aningaasartuutaanerusunut pingaaruteqartunut tapisarnissamut pisinnaatitaaffeqareersimanissaa taamaaliortoqarnissaanut piumasaqaataavoq.

Atorunnaarsitsineq

§ 29. § 23 malillugu tapiiffigitinnissamut piumasaqaatit eqqortinneqarunnaarsimappata, imaluunniit aningaasartuutaanerusut tamarmiusut § 26-mi aningaasanut killiliussat qaangersimajunnaarpatigit, qaammatip tamatuma paasineqarfiata naaneraniit tapiissutit atorunnaassapput.

Kapitali 12

Utertillugit akiliisussaatitaaneq

§ 30. Kapitalit 2-11 malillugit inuk innarluutilik sianiinaarilluni tapiiffigineqarpat, tapiissutit tunniunneqarsimasut utertillugit akilerneqarnissaat imaluunniit utertillugit tunniunneqarnissaat kommunalbestyrelsip piumasarisinnaavaa. Utertillugit akiliisoqarnissamik imaluunniit utertillugit tunniusseqqusisoqarnissamut piumasaqaateqassagaanni, tapiissutit tunniunneqarsimasut pisariaqarunnaarsimanerat inuup pineqartup, angajoqqaatut sinniisoqarsimaguni sinniisuata imaluunniit angajoqqaatut akisussaasuata, ilisimassagaa imaluunniit ilisimasussaagaluaraa piumasaqaataavoq.

Imm. 2. Inuup innarluutillip, angajoqqaatut sinniisuata imaluunniit angajoqqaatut akisussaasuata piffissamiit tamatuminnga ilisimasaqalerneraniit ilisimannittussaagaluarneraniilluunniit, utertillugit akileeqqusineq imaluunniit utertitsinissaq piumasaqaatigineqarsinnaavoq.

Kapitali 13

Kisitsisit atorlugit nassuiaasioorneq

§ 31. Kisitsisit atorlugit nassuiaasiat kommunalbestyrelsip Naalakkersuisunut nalunaarutigisassavai. Programmit immersugassalluunniit nalunaaruteqarnissamut Naalakkersuisunit atugassiissutigineqartut kommunalbestyrelsip atortassavai.

Imm. 2. Kisitsisit atorlugit nassuiaasioernerit ataavartumik nutarterneqartassapput, qaammatillu pingasukkaartut qaammatisiutillu ukiuata naaneri tamaasa kingusinnerpaamik qaammatip 1-p qaangiunnerani Naalakkersuisunut nalunaarutigineqartassallutik.

Imm. 3. Ilasutaasumik nalunaaruteqartoqartarnissaa Naalakkersuisut qaqugukkulluunniit qinnuteqaatigisinnaavaat.

Kapitali 14

Naammagittaalliorsinnaaneq

§ 32. Isumaginnittoqarfiup aqunneqarnera aaqqissuussaaneralu pillugit Inatsisartut peqqussutaani aalajangersakkat malillugit matumani nalunaarut malillugu kommunalbestyrelsip aalajangiineri Isumaginninnermi Naammagittaalliuuteqartarfimmut naammagittaalliuutigineqarsinnaapput.

Kapitali 15

Atuutilerfia

§ 33. Nalunaarut 1.september 2020-mi atuutilerpoq.

Imm. 2. Tamatumunnga peqatigitillugu Inuit innarluutillit tapersorsorneqarnissaannut Namminersorlutik Oqartussat nalunaarutaat nr. 18, 4. november 2019-imeersoq atorunnaarsinneqarpoq.

Kalaallit Nunaanni Namminersorlutik Oqartussat, 7. august 2020

Martha Abelsen

/

Kirsten Olesen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

